



INATSISARTUT

## Aningaasaqarnermut Naalackersuisoq

### ASSILINERI:

#### Peqqissutsimut Naalackersuisoq

Ulloq: 1. nov 2012

J.nr.: 01.31.06/12-00602

### Aningaasaqarnermut Ataatsimiititaliap ataasinngornermi ulloq 29. oktober 2012-imi aalajangiineranik Naalackersuisunut ilisimatitsineq (suliaq nr. 01.31.06/12-00602)

#### Peqqinnissaqarfimmut aningaasaliissutitut ilassutissanik 10,3 mio. koruuninik qinnuteqaat iluarsiiisutitalik

##### Naalackersuisut inassutigaa:

- kontomi pingaarnermi 34.12.03-mi, ataatsimut aningaasartuutini napparsimasunik angallassinernut il.il. tunngasumi, aningaasaliissutit 6.300.000 kr.-inik amerlineqassasut
- kontomi pingaarnermi 34.12.05-mi, nunatta nakorsaataasivianut tunngasumi, aningaasaliissutit 4.000.000 kr.-inik amerlineqassasut
- kontomi pingaarnermi 20.05.31-mi, kommunini aningaasartuutaanerusussanut immikkoortitanut tunngasumi, aningaasaliissutit 731.000 kr.-inik ikilineqassasut
- kontomi pingaarnermi 20.11.50-mi, ingerlatsinermut sillimmatitut tunngasumi, aningaasaliissutit 418.000 koruuninik ikilineqassasut
- kontomi pingaarnermi 20.11.70-mi, suliniutinut nutaanut sillimmatitut tunngasumi, aningaasaliissutit 1.000.000 kr.-inik ikilineqassasut
- kontomi pingaarnermi 30.01.03-mi, isumaginninneq pillugu pikkorissartitsinernut ilinniartitseqqinnernullu tunngasumi, aningaasaliissutit 2.000.000 kr.-inik ikilineqassasut
- kontomi pingaarnermi 30.10.45-mi, meeqqat inuusuttullu immikkut ittumik siliniuteqarfigineqarnerannut tunngasumi, aningaasaliissutit 1.000.000 kr.-inik ikilineqassasut
- kontomi pingaarnermi 30.14.29-imi, pinaveersaartitsinermut tunngasumi, aningaasaliissutit 1.000.000 kr.-inik ikilineqassasut.

#### Aningaasaqarnermut Ataatsimiititaliap oqaaseqaatai

Peqqinnissaqarfimmut ilassutitut aningaasaliissuteqarnissaq Naalackersuisut suliami matumani qinnutigaat.

Ataatsimiititaliaq suliami aalajangiitinnagu paasissutissat annertunerusut kissatigineqarput. Tamanna tunngavigalugu Peqqissutsimut Naalackersuisoq suliaq pillugu **apersorneqarnissamut** ataatsimiititaliamit aggersarneqarpoq. Apersuineq ingerlanneqassaaq ataasinngornermi ulloq 5. november 2012, nal. 14.30 ataatsimiittarfik 2-

mi. Apersuinissamut Ilaqutariinnermut Peqqissutsimullu Ataatsimiititaliap aggersarneqarnissaa naatsorsuutigineqarpoq.

Apersuinermi apeqqutit uku akineqarnissaat ataatsimiititaliamit kissaatigineqarpoq:

1. Aningaasartuutaanerussutit qinnuteqaammi pineqartut qanoq annertutigisumik peqqinnissakkut iluarsaaqqinnerup kingunerisaatut isigineqarpat?
2. Aningaasartuutaanerussutit qanoq annertutigisumik naatsorsuutigineqarsinnaasimanersut paasissutissiisutiginéqassasoq siuliani apeqqummut nangissutit kissaatigineqarpoq?
3. Peqqinnissaqarfimmi atuinerussutissatut naatsorsuutigineqartut ilaat 3,5 mio. kr.-it pensionisialinnut akikillisaassutit atorunnaarnerisa kingunerisaanik aningaasartuuteqarnerasuutaanerarneqarput. Allassimavorli akikillisaassut taanna Air Greenlandimit ukiup 2010/2011-ip nikinnerani atorunnaarsikkaa. Taamaalillunilu 2011-imi 2012-imut aningaasanut inatsit akuerineqarmat tamanna ilisimaneqarsimavoq. Naalackersuisup paasinninnera malillugu pissutsit suut kingunerisaanik akikillisaassutip atorunnaarsinneqarnerata kingunerisa Peqqinnissaqarfimmut 2012-imi missingersuutinut Peqqinnissaqarfimmit ilanngunneqarsinnaasimangillat?
4. Qinnuteqaat missingersuusiordernermut inatsimmut tamakkiisumik naapertuuttutut isigineqarpa? Aningaasaliissutinik allannguinnissamik qinnuteqaatit pissutsinik aningaasanut inatsisip akuersissutiginéqarnerata nalaani siumut naatsorsuutigineqarsinnaanngitsunik aallaaveqarnissaanik aalajangersagaq matumani immikkut eqqarsaatigineqarpoq.
5. Konto pingaarnerit aningaasanik qinnuteqarfigineqartut 25. oktober 2012-imi atuinerussuteqarfiuppat? Missingersuusiordernermut inatsimmi aalajangersakkat tunngavigalugit ataatsimiititaliap apeqqutaa isigineqassaaq, taanna naapertorlugu aningaasat atorneqareerneranni aningaasaliissuteqarnissaaq Aningaasaqarnermut Ataatsimiititaliamit akuerineqarneq ajorpoq.
6. Qinnuteqaat akuerineqanngippat tamatuma kingunissai pillugit paasissutissanik aningaasaliissuteqarnissamik qinnuteqaat imaqartariaqarpoq. Aammalu ilassutitut aningaasaliissuteqarnissamik qinnuteqaat ima siusitsigisukkut nassiunneqarsimasariaqarpoq qinnuteqaat akuerineqassanngikkaluarpat Naalackersuisoqarfiup sukangasumik aqutsinermigut aningaasaliissutinik eqqortitsinnaassalluni. Tamanna pillugu qanoq paasissutissiisoqarsinnaava?
7. Deloittemit siusinnerusukkut kaammattuutigineqartut naapertorlugit konto pingaarnernik qinnuteqaammi pineqartunik aningaasanillu qinnuteqarfigineqartunik Peqqinnissaqarfimmi missingersuusiorderneq naammattumik piviusorsiorlutut isigineqarpa?
8. Katillugit 15 mio. kr.-it missaanik naleqartumik pisariillisaanissaaq Peqqinnissaqarfimmit 2012-imi ingerlanneqassasoq qinnuteqaammi allassimavoq. Tamanna pillugu qanoq erseqqinnerusumik paasissutissiisoqarsinnaava?
9. Ukiumut 70 mio. kr.-it tikillugit Peqqinnissaqarfimmi aaqqissuusaanikkut pisariillisaanissamut periarfissaqartoq Deloittepi siusinnerusukkut tikkuarppaa. Paasinninneq malillugu 15 mio. kr.-it apeqqummi siuliani taaneqartut aningaasanut

taakkununga ilaapput. Pisariillisaataasinnaasut sinnerisa piviusunngortinniarnarat sumut killippa?

10. Missingersuutitut ilanngussani nassiunneqartuni arlalinni, assersuutigalugu konto pingaarnermut 20.05.31-imut, kommunini aningaasartuutaanerusussatut immikkoortitanut tunngasumut, missingersuutitut ilanngussami allassimavoq *"Aningaasat suliaritinnissaminnut utaqqisunik ikilisaanissamut...atorniarneqarput"*. Tamatumani sunarpiaq pineqarpa?
11. Qinnuteqaammut aningaasalersuutissatut konto pingaarnermut 30.10.45-mit, meeqqat inuusuttullu immikkut suliniuteqarfigineqarnerannut tunngasumit, 1 mio. kr.-inik nuussinissaq ilaatigut qinnutigineqarpoq. Missingersuutitut ilanngussami allassimavoq angajoqqaarsianut tunngatillugu suliat aningaasartuutillu naatsorsuutigisamit ikinnerusimasut. Taamaattumik tamatumunnga tunuliaqutaasup itisilernerqarnissaa kissaatigineqarpoq, tassa isumaginninnermut tunngasuni suliniut taanna assut pingaartinneqarsimammat.
12. Qinnuteqaammut aningaasalersuutissatut konto pingaarnermut 30.01.03-mit, isumaginneq pillugu pikkorissartitsinernut ilinniartitseqqinnernullu tunngasumit, 2 mio. kr.-inik nuussinissaq ilaatigut qinnutigineqarpoq. Missingersuutitut ilanngussami allassimavoq *"naatsorsuutigisatut qaffasitsigisumik ilinniagaqarnissamut atatillugu ilinniarnarup ingerlanneqarsinnaasimannginnera, kiisalu inatsisissamut nutaamut pilersaarutaasumut atatillugu pikkorissarnissat pilersaarutaasut 2013-imut kinguartinneqartariaqarnerat"*. Tamanna nalinginnaasumik itisilernerqassasoq kissaatigineqarpoq, tamatumani inatsit sorlerpiaq kinguartinneqarsimanersoq paasissutissiissutigineqassasoq immikkut kissaatigineqarluni. Aammalu inatsisit atuuttooreersut pillugit pikkorissarnissamut pisariaqartitsisoqarnera misissorneqarsimava?
13. Nuna tamakkerlugu nakorsaaserisoqarfiup imaluunniit Peqqinnissaqarfimmi pisiniarnermut immikkoortoqarfiit allat naartunaveersaatinik amerlavallaarujussuarnik pisisimanerarneqarnerat aammalu tamatuma kingunerisaanik aqqissuussaannikkut allanngortitsinerusinnaasut iliuuserineqarsimasinnaasullu pillugit Naalakkersuisoq qanoq paasissutissiisinaava?
14. Qinnuteqaammut matumunnga attuumassuteqarsinnaasunik allanik Naalakkersuisoq paasissutissiisinaava?

Naalakkersuisumik apersuinermini allanik aamma apeqquteqarnissani ataatsimiititaliap naatsorsuutigaa. Taakku tassaasinnaapput aningaasanut inatsisissatut siunnersuutip aappassaaneerneqarnissaanut Naalakkersuisut allannguutissatut siunnersuutaannut apeqqutit.

Naalakkersuisoqarfiit allat tapersiissuteqartillugit ilassutitut aningaasaliissuteqarnissamik qinnuteqaat suliarineqarsimasoq, taamaattumillu ataatsimiititaliap apeqqutaasa ilai konto pingaarnernut Naalakkersuisup suliassaqarfiata avataaniittunut tunngasut, ataatsimiititaliamit arajutsisimaneqanngilaq. Taakku akineqarnissaannut Naalakkersuisut susassaqtut tapersiutissaannik Naalakkersuisoq piniassasoq ataatsimiititaliamit naatsorsuutigineqarpoq.

-----

Ataatsimiititaliap Naalakkersuisumik apersuinerata Naalakkersuisup ataatsimiititaliallu akornanni pingaarnersuilluni tulleriiaarinerit anguniakkallu pillugit naalakkersuinermut tunngasumik oqaloqatigiinnertut sapinngisamik iluseqartinneqartarnissaa Aningaasaqarnermut Ataatsimiititaliamit anguniarneqarpoq. Taamatut oqallinneq ammasumik oqallinnertut sapinngisamik ingerlanneqassaaq.

Kiisalu apeqqutit siuliani allassimasut pillugit allakkiamik kalaallisut danskisullu ataatsimiititaliap Naalakkersuisumik apersuineranut atatillugu pissarsisinneqarnissani ataatsimiititaliap kissaatigaa. Allakkiap kingusinnerpaamik ataatsimiititaliap Naalakkersuisumik apersuinerata kinguninngua uunga nassiunneqarnissaa qinnutigineqarpoq: [julie@ina.gl](mailto:julie@ina.gl). Allakkiap ataatsimiititaliap Naalakkersuisumik apersuinissaanut nassarneqarpat atorneqarpallu taassuma nuutinnera ataatsimiititaliap Naalakkersuisumik apersuinerata aallartinnerani ataatsimiititaliap oqalutnaanun ataatsimiititaliallu allattaanut tunniuteqquneqarpoq.

**Aningaasaqarnermut Ataatsimiititaliap aalajangiinera**

Siuliani allassimasutut paasinnilluni aammalu apersuinerup siuliani taaneqartup ingerlanneqarnissaa siunertaralugu Naalakkersuisut inassuteqaataannut isummernissani Aningaasaqarnermut Ataatsimiititaliap **kinguartippaa**.

Aningaasaqarnermut Ataatsimiititaliap sinnerlugu

Andreas Uldum  
Ataatsimiititaliap siulittaasua

**Assilineri:** Ilaqutariinnermut Peqqissutsimullu Ataatsimiititaliap